

Mbanjyinzlungz:

Aenmbanj Gaeuqgeq Bienq Yiengh Moq

银龙古寨古韵新风

□ Glogh Swboz iogj

Daemzngaeux humx aen mbanj gaeuqgeq.



▲ Rog dou ranz gaeuq miz daemz humx.



▲ Hekyouz youq luengqhongh ndaw mbanj byaij ngonz.



▲ Ranz gaeuq ok vunzcaiz maenh'ak gvaq.



▲ Siengqdoengz Cinz Gyah ciengginh caeuq aen ranz gaeuq de.



▲ Dougungj lienz doeng luengqhongh daengx mbanj.



▲ Gyanghongh louz miz rizgeq.



▲ Doumbanj hen youq laj Byasiujcinghsanh.



▲ Luengqhongh benjrin doeng daengz gak ranz.

Mbanjyinzlungz ing bya dep raemx, seiqhenz byasang hophumx, rangh bya doxdaeb doxlienx lumjbaenz duzlunz nei duz riengz duz ngiengx gyauej bongh mbin; gyang mbanj dwg Byasiujcinghsanh, laj dinbya raemxdaemz sawyau faexgeq daemx mbwn, doxingj doxdaengh; henz mbanj gomak baenz ndoeng, godauz gomaenj, miz sang miz daemq, baenz bi seiq geiq mak homftwt. Ndaw mbanj seizneix lij louzce miz geijcib aen ranz gaeuq seiz Ciuhsung Ciuhsingh hwnjguh haenx, cienheu, vaxmong, aenranz hunggvangq, yienghsiengq gaeuqgeq miz daegsaek, dwg Guengjsae raeuz aen mbanj miz ranz gaeuqgeq louzce henho ndaej haemq ndei ndeu, dwg yienghndei mbanj gaeuqgeq Lingnamz.

Mbanjyinzlungz caemh heuhguh Mbanjsiujcinghsanh, dieg youq baihdoungbaek Libuj Yen Majlingj Cin geij goengleix gya haenx, youq Ciuhsung satbyai couh hainduj hwnjguh. Riuznaeuz Ciuhsung Yinzcuengh vangzyou haj bi (1053 nienz) Diz

Cingh daiq bing daengz baihnanz hoenx bingfanj, ciengginh ranz Yangz daih daihsam Yangz Vwnzgvangj capbing youq rangh Byasiujcinghsanh, gyoengq bing raen dieg neix mbwn raeuj gingj gyaue, couh youq sanj daihlaeng, cugciemh baenz mbanj. Aenvih aenmbanj dep Gamjyinzswj aen conghgamj okmingz neix, caiq gyahwnj ndaw mbanj dingzlai vunz dwg singq Lungz, aenmbanj couh heuhguh "Mbanjyinzlungz". Ndaw mbanj gaeuq seizneix lij louzce miz aenmiuh gaeuq, laeuzdou gaeuq, luengqhongh gaeuq, daizhoenzfeiz, aenmoh bouxyinghyunz hoenx bing Fazgoz Cinz Gyah doenghgij rizgaeuq neix. Cinz Gyah Ginen' gvanj couh youq henz roen ndaw mbanj, dwg aen ranz gaeuq Ciuhsingh seiz Genzlunz hwnjguh ndeu, naj ranz daengz miz aen siengqdoengz Cinz Gyah (gunghyenz 1839-1885 nienz).

Byaij haeuj laeuzdou gaeuq le, cix dwg diuz roenbenjrin iq seuqcingh ndeu, song henz roen miz baenz aen baenz aen ranz gaeuq ndoj youq

laj raemh faex geq, yienghsiengq gaeuqgeq gyaqciq, hawj vunz roxnyinh lumjbaenz byaij haeuj le seizdaih Ciuhsingh Ciuhsingh. Ndaw mbanj seizneix lij miz bet aen ranz gaeuq seiz Mingz Cingh hwnjguh haenx, yiengh ranz cungj dwg ranzseiqhab, aenranz sangvid, baenz caengz baenz gek, baizlele daengj youq; faqciengz aeu rindiuz caep gieq, cienheu caep daengz dingj, vaxmong hoemqgang, baihdaw ranz aeu faex benj gekfaen guh sam fungh, dou cueng deu va; gyanghongh aeu benjrin bubingz, ngaueznugub seuqcingh, yienghsiengq ndeiyaewj. Gij luengqhongh ndaw mbanj, aeu benjrin bu baenz, aeu ngeuqrin, rinmaxluenx gop bien, seuqcingh, caezcingj, caemdingh. Ndaw mbanj gungh miz luengqhongh cibngeih diuz, moix diuz luengqhongh cungj guh aen dou ndeu, daengx mbanj gyoebbaenz aen dihi ndaej gunghoenx ndaej hensouj ndeu.

Baihbaek aenmbanj, dwg benq raemx gvangqyub ndeu, henz daemz miz aen loekraemx hung gaeuqgeq ndeu, dwg lajmbanj Cungguek cungj hongdawz dwkraemx cei q gaeuqgeq ndeu lo, ciuq goenggeq ndaw mbanj gangj, gizneix nyuenz miz aen ranzdajniej loekraemx baenq ndeu, haujlai bi gaxgonq aenvih aenranz vaih lai lid bae lo, seizneix caenh louz roengz aen loekraemx neix.

Byaij ok aenmbanj, riengz diuz roenbenjrin mbaeklae bin doxhwnj, caenh raen byongh bya miz haujlai conghgamj gak cungj gak yiengh aen hung aen iq, saekseiz hix raen miz lwnyez comz youq ndaw conghgamj guhcaemz. Bin daengz gwnz dingbya, raen miz benq diegbingz ndeu humx dwk hawj vunz yawj gingj, miz vunz nyaengq dwk baihneix yawjyawj baihaenx ngonznongz, caemh mbouj dingz dwk ingjsiengq louzniemh. Yawj roengz laj dinbya, Mbanjyinzlungz youq ndaw faexheu loq raen loq mbouj raen; ngonzyawj seiqhenz, Byasiujcinghsanh raemx sawyauyau faex heuswdswd hophumx, ndeiyaewj raixcaix, hawj vunz roxnyinh lumjbaenz haeuj daengz le diegsien nei.